

# Na Danima maline i meda 70 izlagača

RAŽ i Općina Žepče organizatori su dvodnevne manifestacije



godine proizvedeno 1.226 tona maline

Želeći pomoći proizvođačima sa područja općine Žepče, ali i drugih lokalnih zajednica koji dosta toga proizvode, ali nemaju mogućnosti za promociju svojih proizvoda, Razvojna agencija Žepče (RAŽ) u saradnji sa Općinom Žepče i pod pokroviteljstvom načelnika Općine Mate Zovke organizuje dvodnevnu izložbeno-sajamsku manifestaciju Dani maline i meda.

Kako je za Oslobođenje kazala Branka Janko, direktorica RAŽ-a,

**U Žepču je više od 300 hektara površine pod zasadima maline, a sadnjom se bavi preko 2.000 proizvođača**

ideju koja postoji već godinama odlučili su realizovati uz pomoć osam zadruga sa ovog područja.

## Predavanja

“Manifestacija se održava danas i sutra. Prvi dan, odnosno danas održat će se edukativna predavanja za proizvođače jagodičastog voća i pčelare. Organizacijom predavanja željeli smo da pomognemo proizvođačima da se upoznaju sa svim novitetima u proizvodnji, tehnologiji i opremi kako bi njihovi proizvodi bili kvalitetniji i konkurentniji na tržištu. Predavanja će biti na području Željeznog Polja, u Ozimicama i Žepču, a za svako predavanje imamo više od 200 prijavljenih proizvođača”, kazala je Janko. dodajući da će manifestaciji

prisustvovati više od 40 udruženja i zadruga.

Kad su u pitanju predavanja iz oblasti jagodičastog voća, veliku zainteresovanost proizvođači su iskazali za predavanje Adnana Maličevića, koji će govoriti o savremenim tehnologijama uzgoja maline, ali i za predavanje Rade Ljubojevića, vlasnika Sirogojno kompanije, koji će predstaviti svjetske trendove u sektoru jagodičastog voća.

Pčelare će, kako je istakla Janko, o saradnji pčelara i voćara u cilju boljih prinosa te očuvanju pčelinjih zajednica upoznati Rajko Radivojac, ekspert za pčelarstvo.

Za drugi dan manifestacije, tj. sutra planirano je da izlagači predstave na štandovima svoje proizvode, a prema njenim riječima, jako su zadovoljni brojem pristiglih prijava, te bi se trebalo predstaviti više od 70 izlagača iz cijele BiH.

## Firme

“Imamo prijavljene izlagače iz Zavidovića, Maglaja, Tešnja, Teslića, Visokog, Livna, Tuzle, koji će predstaviti jagodičasto voće i proizvode i prerađevine od voća, kao i med i prerađevine od meda. Također, imamo i dvije firme koje će predstaviti svoju opremu potrebnu za ove proizvode”, kazala je Janko.

Ona je dodala da je Žepče druga općina u BiH po zasadima jagodičastog voća.

“Imamo više od 300 hektara površine pod zasadima maline i preko 2.000 proizvođača koji su prošle godine proizveli 1.226 tona maline. Kad je u pitanju med, oko 200 proizvođača sa područja ove općine prošle godine proizvelo je 80 tona meda”, istakla je Janko.

**ALEMA PENDEK**